

D'Viert'Itraga

Weelona tuit da Sechsa–Muhm
d'rum lont a a poor Monna ee:
Vom Kölla aussetrog'n auf d' Load
mit d'Viert'lschaffön soi'n's in Wee.

Um so a Oawat is a Griss,
de Towerga san' do gonz schnö,
weu umasunst, so is's da Brau,
ko 'n iada saufa wos-da-wö.

Da Wenek-Michl, Schuister-Steff
und a da oide Mirler-Schaa,
de 'kriag'n koa Göd fir so a G'schaftl,
a Rausch auf 'Nocht tuit's fir se a.

So stöt da Muhm a Schaffö Hastrunk
hin auf d'Köllastiag'n gonz unt'n,
om Griff hängt er a Kriaglgas'l
und a a Kirz'n wird on'zund'n.

In Dreiß'geema hot a scho' ong'schlog'n.
Da Baua fü't de Schaffön on,
und d' Viert'Itraga schlepp'n's auffe,
dass ob'm da Hondla lo'na ko.

Der steht om Wog'n bei seena Load
und schitt't an iades Schaffö Wee,
vos de Towerga eam bringen
virsichti' in see Giaßkor ee.

An iad's Moi, wonn da Wenek-Michl
mi'n laa'n Schaffö wieda z'ruck
in 'Kölla owe g'miatli geht,
nimmt er vom Hastrunk oan, zwoa Schluck.

A de onern zwee Falotten
fohr'n mi'n Kriag'l oft und vü
auf da Stiaig'n ins Viert'lschaffö
und sche longsom 'kriagn's an Schwü.

Unt' da Muhm – er is ja sporsom,
's urass'n net seg'n er ko –
fü't, dass's jo nix ausseschlompan,
d'Schaffön nur mehr hoiwat on.

Do' de drei, de sauffan weida,
fir se is's wia a Feiato.
Endli is da Wee donn g'lo'nt,
da Hondla zoit und fohrt glei o.

A auf da Stia'g'n des Schaffö Hastrunk
is bis om Grund scho völli laa.

Oi' drei hob'm's an Ries'nrausch,
da Steff, da Michel und da Schaa.

Do' zum Glick fir de drei B'soffan
kimmt da Wachauer-Martin g'rod'
mi'n Schukorr'm durch de Köllagoss'n,
lo'nt's auf und nimmt's mit hoam auf Plott.

Om next'n To hob'm's recht an Kota
und da Wachauer kimmt kassier'n:
Finf Kreiza nimmt a vo an iaden,
des is see Tax' fir's Leichofih'r'n.

Waneck Michael, 1985 – 1929, geb. In Platt 164

Martin Wachauer, 1856–1921, geb. in Plott 85

Muhm Alois, 1860-1923, geb. In Niederschleinz

1991